

06/05/2001

Abdul Ghani tauke kelab golf

MESKIPUN sudah meninggalkan persada politik lebih dua dekad, usaha dan kegigihan meningkatkan status Melayu masih tersemat dalam jiwa bekas Ketua Menteri Melaka, Datuk Setia Abdul Ghani Ali.

Pada usia 77 tahun, beliau cergas mengendalikan kelab eksklusif "Golden Valley Golf & Country Club" (GVGCC) selain ladang kelapa sawit, dusun buah-buahan dan kolam ikan air tawar di kawasan di KM 25, Air Panas di Bemban.

"Kewujudan GVGCC untuk menggalakkan orang Melayu berbudi pada tanah kerana melaluinya, taraf hidup mereka dapat ditingkatkan. Yang lebih utama, ketuanan Melayu akan terjamin," katanya.

Ghani berkata, GVGCC mengambil pekerja daripada kalangan Melayu dengan tujuan menggalakkan pembabitan dalam sektor pertanian, akuakultur serta pengurusan industri golf.

"Sambil mencari rezeki, mereka akan terdorong untuk berbudi kepada tanah apabila melihat kemajuan yang ketara di sini," katanya.

Abdul Ghani berkata, orang Melayu dapat meningkatkan taraf hidup mereka melalui pembabitan dalam tiga sektor ini.

"Melaluinya, mereka dapat meraih hasil pendapatan memuaskan untuk mengumpul modal untuk menerokai pula bidang pemprosesan dan perindustrian untuk menukarkan hasil pertanian kepada produk-produk tambah nilai untuk pasaran tempatan dan luar negara.

"Ini akan meningkatkan lagi pendapatan serta taraf hidup para petani dan penternak kita," katanya.

Adalah penting orang Melayu yang memiliki tanah walau sekangkang kera sekalipun, memeliharanya untuk menjamin kesinambungan hidup mereka.

"Kita perlu tanah untuk mendirikan rumah, bercucuk-tanam, mengadakan kenduri-kendara dan untuk upacara pengebumian bila kaum keluarga kita sudah tiada lagi.

"Jika tiada tanah, kewujudan bangsa Melayu akan tergugat."

Beliau berkata, pengenalan Pelan Pertanian Jangka Panjang (OPP3) oleh Perdana Menteri, Datuk Seri Dr Mahathir Mohamad untuk mengurangkan kesan kelembapan ekonomi dunia, adalah wajar.

"Sektor ini tidak pernah mengalami kemelesetan. Melalui revolusi pertanian, orang Melayu dapat berdepan dengan era "globalisasi" dan "dunia tanpa sempadan" pada 2003."

Penubuhan GVGCC pada 1994 juga bertujuan menggalakkan Melayu berkecimpung dalam industri antarabangsa seperti sukan golf.

(END)